

Nuorttanaste

»Gæča dam Ibmel labba,
gutte mailme suddo guodda!»

»Son dagai rafhe su ruosa
varai bokte.»

No. 15.

13. jakkegärdde.

»Nuorttanaste« maksa ovta kruvna jakko
dagast, bladde dinggujuvnu juokke poasta-
rappe bokte.

15. August 1911.

»Nuorttanaste« olgusboatta guovte gærde
manost — dam 15ad ja dam 30ad bæive
juokke manost.

Jesusa gæssemfabmo.

Go mon bajasvalddujuvvum ædna-
mest aigom mon gæsset buokaid lu-
sam. (Joh. 12,32).

Buokaid! I dušše muttom
oligusvalljijuvvumid. Buokai aig-
go Jesus gæsset lusas, sikke oap-
pavažaid ja oapakættes olbmuid,
sikke riggaidd ja vaivašid, sikke
stuora ja smava suddolažaid aiggo
Jesus lusas gæsset.

Likkostuvvago dat?

Vuoi varmas i buokaiguim.
Ædnagak læk si gæk aigi čada
læk gessujuvvum Jesus lusa: mut-
to ædnagak æi adde ječaidæsek
gæsset; si vuostaičuožžuk. Olmuš
matta Jesusa gæsotame vuostai-
čuožžot. Mutto jos nuft šaddage,
de čuožžo dat almaken lika nan-
noset, atte Jesus aigoi gæsset lu-
sas buokaid.

Jesus læ jabman buokai ou-
dast. I oktage olmuš lappu dam-
diti go son i mattam bestujuvvut,
mutto damditi go son i dattom
bestujuvvut. Damditi læk dak
dubnijuvvumak ječa sivalaža sin
dubmitussii. Si læk dubmen je-
časek. Jesusa rakisvuotta fatma-
sta buok, mi olmuš nama vuolde
manna. Buokai aiggo son gæsset
lusas. I son aigo gæsset sin ov-
ta særvvai daihe „sekti“ mutto
lusas; dastgo kristalašvuotta i loek
okta særvvam duom ja dam osko-
doydastussi; mutto kristalašvuotta
læ særvvam Jesus Kristusin; dam-
diti i berre oktage ječas jeddet
daina jurddagin, atte son gulla
dam særvvai, gæst læ dat riftes
oappo, daihe atte sust læ čaba ja
sivvades ællem. Mon ferttim læt

gessujuvvum Jesusest sudnji per-
sovnalažat. Mon ferttim læt šad-
dam su oabmen, nuft atte son læ
mu bæste. Dat persovnalaš ga-
skavuotta Jesusi dat læ mi bæsta
mu. Ja Jesusa gæssema bokte
daggar gaskavuotta boatta.

Mutto Jesus gæsota olbmu
gaskaomi bokte, su sanes ja su
vuoinas bokte gæsota son. Go
don logak daihe gulddalak Ibmel
sane, læ Jesus du lutte su rakis-
vuoda gæssem famoin.

Alle vuostaičuožo! Alle buoš-
šot du vaimod! Alle čana ješad
suddoi gidda du ječad lakkiguim.

Okta ravdde, gutte elimoad-
de čuode jage dast ouddal lavi
ramadallet, atte son i goassege
lakki rakadam mast oktage rašes
mokke gavdnui. Muttom bæive
suttadi son gonagasa ja šaddai
giddagassi bigjut ja lakkidi čad-
nujuvnt. Son ječas dasto jeddi
daina, atte go su vašalažak legje
mannam, de son occa dam lakkest,
masa son læ čadnum ovta rašes
mokke, maid son doagja ja ječas
friavutti luoitta. Mutto de gav-
nai son, atte dat lakki læi su je-
čas fabrikast ja i læm dast okta-
ge rašes mokke son dorvotesvuod-
dast fertti dast čokkat buok doai-
vo læi vassam.

Ædnagak læk dak ravkek,
gæk læk čadnujuvnum lakkidi
maid si ječa læk rakadam. Vare
Ibmel vuoiŋa bæsaši buokai
čoaiddet daina lakkini.

Vuollegasvuotta.

Jos don læk Kristusua liedde,
de diede, atte du vagjulus fertte
læt basteles lanjai gaskast, ja

gæča bærrai, atte don ik gierda-
mættomvuoda bokte daihe čiegos
goarggadvuoda bokte šadda okta
bastelas ladnja.

*

Scriver celkka: Mon im mat-
te jurdašet ovtage legjona alma
famoitaga, im ovtage riebana al-
ma viekisvuodataga imge ovtage
negara alma čappes naketaga.
Sæmma lakai im matte jurda-
šet, atte læ ovtage kristalaš, gut-
te guvodda su Hærras gova, alma
vuollegašvuodataga.

*

John Arnt namata čuoovovaš
vuollegašvuoda osid daihe bittaid:

1. Obba vaimost ječas doallat
hæjobun go ærak. 2. I ovtage
bagjelgæččat daihe dubmit, mutto
alelassi gæččat ječas bærrai.
3. Gierddavažat gillat bagjelgæ-
čama ja illodet damtiti. Buorre-
mielalažat cuigotusa vuostai-
valdet, i dušše daina gæk læk stuo-
ra arvost, mutto maidai hæjoin.

Kæisar Rudolf lavi celkket:
„Mon læm davja gatam, atte mon
læm læmaš garas ja ustebmættom,
mutto im goassege atte læm læ-
maš rakislaš ja logje.

Okta rambbe gutte soabbes addi missoni.

Sardnedægje læi su sarnes
loapatam, ja gæčai darkkelet dam
fuolamættos čoaaggalmasa ala, mi
su oudast dast čokkai. Son læi
obba vaimostes gæččalam sojatet
gulddalegjides væketet ovta dar-
bašlaš miššon-bargo. Son læi
gæččalam sin ožudet ibmerdet
dam buristsivdnadusa, mi boatta-
addemest Ibmela iika videdæbmai

mutto dat i læm sudnji likkostuvvam.

„Ibmel armed min,“ šuokketi son, go son læi su sarnes loapatam. Mutto son i mattam oaidnet man čiegnalasast likkastam dat ucca Magdaš læi, gutte čokkai vuolassogjam oivin gukken vuollen čoaggalmasast. Su vaibmo læi njorranam sarnes bokte.

„Hærra Jesus,“ celki son, „must i læk mikkege, maid addašim. Mon galle veketifčim daid vaivan olmušrieboid gullat ožžot Jesus birra; mutto must i læk mikkege addet. —“ Mutto bodi jurddagi: „Alma don matak addet du soabbat, moadde kruvna damge oudast, mattek ožžot. Adde dam.“

Dallanaga valdi son soabbes ja addi dam særvegodde balvvalægjai, gutte læi birra mannamen ja čoaggemen dam hæjos daihe uccanaš kolækta. Olmai gæčai imaštallamin nieida ala, mutto go son ibmerdi su oaivela, valdi son soabbe ja doalai dam doargestægje giedain oudan su gulddalegjidess oudi ja stuora duodalašvuodain celki:

„Oainebetet go di dam soabbe, ustebidam? Dat læ ucca Magdača soabbe, ja dat læ okta hui darbašlaš dingga sudnji, ja dam læ son addam Ibmel rika vide-dæbmai. Jaskadvuotta čuovoi oane-kaš bodduš dast mañnel. Gulddaleggek bonjadegje ječaidæsek bænkai alde mašotæmek.

Sardnedægje jærαι: Gavdnu-go dast oktage, gi gærgga addet dam summa, maid soabbe maksa, ja dasto soabbe ruoktot addet mannai, gutte damtaga i bæsa gosage?

„200 kr.“, celki bankdirektora doargestægje jienain.

„300 kr.“, celki muttom æra.

„400 kr.“, čurvi okta goalmad olmai.

Dam lakai faddai aktiona dollujuvvut dassači go okta lista mi čajeti 2,300 kr. bigjui bævde ala.

Ucca Magdas, dast gost son čokkai, i læm astam jurdašet moft son ruoktot galgai bæssat, daihe moft son boatte aigest galgai birgget alma soabbetaga. Kristus

læi buok sust gaibbedam, ja son læi buorre mielast buok addam daina oskoin, mi muittota migjidi Abraham birra.

Dast mañnel bodi okta nisson su lusa ja celki: „Rakis Magda du soabbe læ sisabuktam miššoni 2,300 kruvna, ja dal boatta soabbe du lusa fast. Valde dam dal!

Dal šaddai dat čielgasen Magdai, atte su ucca addaldagaš læi vuostaivalddujuvvum Ibmelest, ja dal addujuvvum sudnji ruoktot.

Buristsivdnadus ærai diti.

Hærra davja buristsivdneda muttom olbmuid ærai diti.

Son buristsivdnei Isak Abraham diti.

Son saddi valljogasvuoda Potifar dalloi Josef diti.

Su buristsivdnadus oroi obba Israel alde Josef su balvvalægje diti.

Babylonast læi buristællem Daniel diti.

Buokak dam skipast, mi riev-tai gaddai Malta sullo ala, bestujuvvujegje damditi go Paulus læi sin særvest.

Buristsivdneduvvum dinga læ dat, atte okta Ibmeta olmuš læ mielde go likkotesvuotta boatta. Alma læge Jesus cækkam atte oskolaža ællemest galggek ælle čæcceravnjek golgedet.

Hærra loppedi Abrahami, atte son aiggo Sodoma sæstet, jos son gavdna 10 vanhurskasa dobbe.

Ibmeta olmak ja nissonak læk ædnam saltek. Buristsivdneduvvum læ dat olmai ja nisson, gutte ælla Ibmeta mu lakka, atta buristsivdnadus buktujuvva daidi gæk sin birra assek.

Su oaffar vuostaivalddujuvui.

Ibmel læ bigjam imašlaš stuora famo dai giedai sisa, mak læk roak-kotuvvum rokkadussi. Osko rokkadus Jesus namast læ famolaš. »Buok maid di gaibbedeket rokkadusast, oskot dam, de di ožžobetet.« Math. 21, 22).

Okta nuorra fiskar asai su edni-nes ovta baikest min ædnamast su vaimo siskemus rokkadus lei, atte su ædne galgai algget dovdat ja rakistet bæste; mutto su dabalaš ugjovuotta

hetti su sardnomest ædnases dam aše birra. Mutto ædne didi atte su bardne rokkadalai su oudast.

Muttom bæive go son mæra ala galgai vuolgget manai son sisa ædnes lusa ja valdi suina erinoamaš vaimolaš æro, dat læi dego lifči son diettam atte læi mañemus gærde soai oainaladdaiga dam ællemest. Son calki ædnasis, atte son buoremelast addaši su hægas, jos son fal dam bokte ječas jorggalifči Ibmele ja ocaši sielo bestujune. Dam bæive šaddai garra dalke. Dat vanas man siste dat nuorra olmai læi gobmani ja son gavnai su jabinemes dai galma baroi gaskast.

Go su lika gavdnu, vællai son roakotuvvum giedaiguim ja rafhalaš muodoiguim.

Go ædne dam oini, de njur-rani su vaibmo. „Mu oudast læ son rokkadallam su mañemus bod-doides siste,“ celki son. „Son fertti hægas oaffaruššat, vai mon ječam Ibmel guvlui jorggalifčim ja bestujuvvišim.“

Barne rokkadusak legje gul-lujuvvum, vuollegašvuodast ja oskoin jorggali ædne ječas su bæstes lusa.

Dak golbma bahas činga.

Kardinal Gibbons Davve-Amerikast, daina okti ovtastattu-juvvum statain læ olgussaddin ovta baimangirje, mast son cælkka, atte dat amerikanalaš særvevuoda ællem billestuvvu golma baha dingast, ja dak læk:

1. Naitusarranæmek.
2. Dak religiõnates skuvlak ja
3. Bassebeivi appebasotæmek.

Son čalla, atte jos kristalazak duodast æi alge vuostaibarggat dam golma dinga vuostai, de olbmuk farga bodnetesvuoda ravda alde čužžuk.

Aige jottelvuotta.

Aige skipa doalla su kursas ja borjasta dam mærreduvvum havna vuostai. Mi buokak læp dam skipa alde, ja dat skipa manna, dat i berust, dast maid olbmuk dam alde dakkek, jogo si borrek daihe oddek, čokkajik, vællajik daihe vazzek. Aigge doalvo min alelassi oudast guvl-

loi dam ædnam vuostai, gost i læk aigge šat. Min jotteima vuolde agalašvuoda vuostai i læk mikkege orostemid, jogo mi likošep daihe valddet ællema olles duodalašvuodain. Dalge go don daid linjaid læk lakkamen, manna dat stuora skipa oudast guvlui jottelvuodain.

Farga šaddap mi oaidnet agalašvuoda gadderavda, satta dat šaddat fargabut go mi doaivvop. Mi berrep læt garvvasak gaddai mannat ja logo dakkat dam stuoremus ašest, mi læ sielo bestujume ašše. Mi buokak galggap olmostuvvat Ibmel duomostuolo oudi.

Miššona Gaska-Afrikast

čajeta stuora ouddanæme ja šaddo. 30 jage dast ouddal algi miššobarggo dobbe. Dat bæggalmas jotteolmai ja amas baiki iskadægje Stanley bivdi obba vaimostes, atte juoke ovta kristalaš oapatægje saddet daidi amas guovlloidi. Dal læk bagjel 100 dobbe rieggadam vihatuvvum bapa, 2000 girko ja girko ja skuvlak. 60,000 jorggaluvvum ja gastašuvvum olbm. 300,000 manna daina kristalaš skuvlain. Ugandast læk 32 papa ja 2500 dobbe rieggadam evangelistalažak ja væketægje gæina læk 1000 girko ja sardneviste. Okta girkoim læ nu stuores, atte šiettada 4000 olbm. Dobbe læk 50,000 gastašuvvum, ja buokak čoaččanek ibmelbalvvalussi daidi moaddelagaš baikidi, gosa si gullek. Ugandast dušše læk dat 100 duhat, gæk mattek lokkat ja čallet ja 250 duhat, gæk vuostai valdde religion oapatusa. Dat ouddanæbme læ æmbo go dabalaš obba miššohistorjast.

Obba Afrika olmušlokko rekemastuvvu 175 miljonan. Dai ollo olmui særvest barggek 2470 protostandalaš miššonæra ja 13,089 dobbe rieggadam mieldebargi.

India.

Vaiko bibal læ jorggaluvvum 78 indialas gielaidi gavdnu dobbe vela 75 njuokčamgiela, masa bibal vela i læk jorggaluvvum, ja daid gielaid sardnuk oktibuok 70 miljon olbm. Dak olmuš čei matte oappat dovddat Ibmel sane.

Ceylon sullet alde læk vela bagjel 9000 ænan gavvuga, gost i læk ok-

tage kristalaš. Ja barggek evangeli-um balvvalusast æi obba gavdnuge mæsta dobbe. Damditi læk daina maņemus jagin alggam bibalid olgusviddedet dobbe, ja mannam jage vuovde 71,000 basse čallagid.

Boares general Booth

ain arvva jottet, Gieskat læ son fidnam Kristianiast. Son læ juo bagjel 80 jagé boares, mutto læ ain virkoi ja nagada ain sarnid doallat, mutto min vel golma havege bæivest.

Frøk. S. Lande.

»Lappernes Ven« muittala, atte dam 25 juli vulgi Frøk. S. Lande, Stavangarest su doaimatusas algatet nuftgo særvegodde diakonisse Tanast. Su barggo šadda oappaladdat særvegodde buccid ja vaivašid ja sigjidi dam væke ja rađe addet, nuft gukkas go son satta. Son læ dat vuostas særvegodde-»oabba« Sameædnam gaddebaiken. Nuftgo mi diettep læ okta daggar Hammerfestast. Ja son læ dat vuostas diakonisse bargo doaimatægje Sami gaskast. »Lappernes Ven« lašeta, ja mi doaivvop, atte son i šadda dat maņemus, mutto atte maņestaga bigjujuk daggarak buok Sami særvegoddidi; dastgo dat læ sagga darbašlaš, dainago gukke læ Sameædnamest dallo gaskak ja oappam buocceaidardæbme i læk dobbe gæpas oazžot. Madden læk diakonissek mæsta juokke baikest.

Frøk. Lande læ su oapas ožžom Flekkefjora buocamviesost. Tanast šadda su barggo ordnejuvvut gieldapapa Jærvell ja ovta særvegoddest valljijuvvum komitea bokte.

Maidai mi savvap Tana særvegoddai likko særvegodde balvvalægje nissonen

Giieldapappa Amlie laga oudast.

Ovta giieldapapa birra læ avisain davja læmaš čalluvvum damdiči go son læ særvvam daina bæggalmas njuokčamiguim sardnægje Barrattin. Son læ suina ovtast čoaččalmasaid doallam, ja vela rappam girkkoge Barratti. Dasa dieđostge æi likom ænas oasse su særvegoddest, ja go læi bismavisitats maņemus palmasodnabæive, de hõtte ædnag vaiddaluš čallagak særvegoddest bismi. Dai čallagi siste celkkuvvui, atte Amlie i læm dal šat dokkalaš pappan manga sivast. Ovtast daina vaiddaluščallagin celkku-

juvvui, atte olbmuk čei aigo saddet manaidasæk komfirmationskuvlai Amiie luša. Giieldapappa ješ addi aše eisevaldi oudi, ja gulatus daihe ašid dutkam læ dolluvvum dappujum uvvai duokken. 17 vittana læk dutkuvvum. Mangas daina legje oeska komfirmerijuvvum nuorragærdde. Moft daina ašin manna, dam čei dieđe vela.

Afrikast

læ dat gæsse læmaš galmas. Manga sajes læ læmaš buolaš.

Japan læ rakadattemen

ovta aimoskipa, mi galgga adnujuvvut soatteveki.

Okta blækkaslagar

jotta mailme mietta ja vuoidda girko-flöiaid. Dam bargost ælla son.

Stuora addaldak miššoni.

Dat stuoremus addaldak mi læ bakenmiššoni adduvvum goassege læ vissaset dat maid amerikanalaš John S Kennedy addi dam presbyntianalaš bakenmiššoni. Dat i læm ucceb go 11 miljon kruvna.

150 buocamviesom ja 1800 skuvlain læ adnumuš boattam dam særvvai, mi dai ruđai oazoi. Min Hærra ja Ibmel læ dal hoapatæme su evangeliemes videdæme maillest. Son ješ matta gaskaomid matkai oazžot.

Tysklandia ja Frankrika

gaskast læ dal gaskavuotta čavgga Marokko diti. Dam ædnamest vuovdujuvvujuk 13000 olbm. jakkasažat slavan. Bucremus lifči jos Tuiskaænem ja Fankariki gœččalifčiga dam garrodusa erit oazžot Marokost.

Okta værre Kristus

læ dam maņemus aigest čuožželam Japanest. Son celkka, atte son persovnalazažat ovtastatta sikke Kristusa ja Budda.

200 tyiska doaktara

læk studerim reisost dabe Norgast. Si læk fidnam Larvika ja Sandefjora lavggodam baikid buocamviesoi ja æra rakkanusaid. Si læk burist likom min ædnam buocam-rakkanusaidi.

Daidek divras aigek šaddat.

Sikke Engelandast ja Frankrikast bottet dieđetusak, atte borramušgalvvo divro hirbmadet. Ballamest læ, atte dat minge dabe guoskata.

Amerikast Norgi čuoiga.

Okta amerikanalaš bladde muittala, atte muttom olmai arvvala vuolget čuoiggat Amerikast Norgi. Dam olbma namma læ L. P. Rindal. Son læ rekenastam, atte son dam reiosi darbaša 3 jage. Son fertte diettelasse mannat Kanada ja Alaska bagjel. Bæringnuore raste-manna son isa alde. Dasto bigja son kursa vævtas čada Sibiria ja Ruošaædnami. Dai avdin meci čada Siberiast arvvala son vuogjet bædnagiguim. Moadde olbma arvvala son mieldes oažžot. Berramuš i valddu ollo mielde, dam arvvala son ožžot matke alde. Na dat matke gal gierdda čuoiggat. Gæse aige daihe dam muotates aige jagest fertte son diettelas sabetid guoddet.

Rindal læ ouddal bargost læmaš Alaskast. Son læ Dača, guite 7 jage dast ouddal manai Amerikai.

Hammerfestast

muittaluvvu, atte dat Skiervaruta galga dal algget.

Massi čalmi hattanaloin.

Okta nuorra olmai Ruotarikast læi čuožžastam lokta gurri ja galgai gæččat ollo timo læi. Go son čuožžoi dast, de vaziga guokte nieida su mædda gæina legje stuora hattanalok. Dam nubbe nieida hattanallo deivai dam olbma čalmi nu fastet atte i læk dietto birggeta go čalmes.

»Fria æna« Amerikast.

Okta Darogiel bladde muittala, atte ædnagak vulggek Amerikai dam jakost, atte dobbe daina okti ovta-stattujuvvum statain ollo ædnamak, mak ai læk duktijuvvum, ja maid raddetus skenke mæsta nufta gæsaikenassi, gutte halideš ædnam valddet. Mutto dat jakko læ boastot. Dat i læk nuft. Manga Darolaža læk dam boattam fuobmat ja bæččadet dovddat. 20—30 jage dast ouddal matte olbmuk oažžot nuft ollo ædnama go halidegje. Mutto dal læ nu stuora jæraldak ædnami manjai, atte dušše ucca oasaš, daina gæk ædnam sittek, ožžuk. Giskak go læi ænamjuokkem Madda-Dakotast, legje 80,000 occe ædnamidi mutto i jullum ænam æneboidi go 8000. Dat i mattam jukkujuvvut smaveb osidi. Ja jos olmuš læge nuft likkolaš atte ænabitta fidne dam lotteriast, de læ dat ænam davja nuft lægjo, atte dam duktim maksa

duhati ja fast duhati dollara.

Biso sidast nuorra olmai ja nisson ja dukte Norga ædnama, dat juo guoddet buorreb. Amerika i læk dal nuftgo ouddal.

Jos dust

læ mikkege maid sidak vuovddet, de diedet »Nuorttanaste« alde, de don fargga jodetak dam.

Sorbmi ječas ja manaides.

Muttom Ruotalaš, gutte asai lakka Stokholm gavpuga sorbmi barberdaihe rakanibin su 4 manas ja dasto ječas. Olmai læi 54 jage boares, læi læska-olmai ja læi dam manemus aige læmaš bargotaga. Ælatus moraš vissa læi sivvan dam hirbmus dakkoi.

Dat daro-amerikanalaš damppalinja galgga su vuostas dampa ožžot 1. januar 1913. Dat galgga dakkujuvvut Engelandast.

Stuora arbbe.

Okta olmai, Johan August Lindgren, rieгадаin 1829 Ruotarikast, sirdi muttom jage Norgi ja læ dal jabman. Son manjasis guodda arvo mielde 20,000 kruvna. Su arbolažak occujuvvujek. Gutte dieđo matta dam birra addet čallus Kammarsskrivari Nils Eng Linegatan 8, Göteborg.

Suoinesaddo dam jage

læi læjjob ballai dabe Nordlanda amtast ja erinoamašet Vesteraalast, ja goikko læi vel læjjob. Arvve læ læmaš mæsta juokke bæive. Potetosadda i læk bahage.

Doluš boares havdde gavdnam Suoma-ædnam'est.

»Åland« muittal atte magistar Bjørn Cederhvarf, Helsingest erit, læ Jomala'st gavdnam olles olbmu davtid muttom boares havdest, mi gaddujuvvu læt 5000 jage boares. Havdest gavdnui maid lairelitte bittak ja dugjumbierggasak, rakaduvvum gæđgest. Lika læi bigjum havddai čægnot.

Danemarko hœrrak,

allanalag olbmuk, gastašek manaidæsek čacest mi læ valddum Jordan dœnost. Muttom gavpasærvve Tuiskarika'st viežata Jordan dœno čace ja vuovdda boattali mielde.

Sami manaisidast

Skierva suokkanest læ dal 31 mana.

Stuoradigge

gærgai ja ærrani 19ad august.

Kolera davdda

gullu Turkarika'st. Ædnag muhamedanalažat jabmek.

Jurddagak.

Go don loppedak nubbai juoida burid dakkat, de ale vajaldatte dam.

Go don aittak nubbai mavsatet, de vajaldatte dam.

*

Riggast læ davja æneb morrašak go vaivašest.

*

Sadne doalle olmuš bæssa davja færa man barggvi ja doaimatussi; mutto dat gi sanes i doala, son manjæssi hilggujuvvu.

»Finmarkens Amtstidende«

savva vare Graff fast saddaši ædnamhærram Sameædnam amtti.

»Hammerfest-moivve.«

Hammerfest'ast ain dutkek dam færran birra; mi dast gidđag læi dam rafhalaš gavpugest.

Lagesvuona internata

læ dal garves. Skuvladirektœra oidnu avisain occamen dalodoalle dokko.

Muttom daža Drackenberg

gi jami guokta čuode jage dast ouddal saddai 142 jage boaresen. Go læi 100 jage boares, naitta i son manjeb gærde.

Dulyve Kinast.

Kinast muittaluvvu, atte stuora vahag læ saddam dulyve gæčeld dobbe daina čuovvovaš provinsain Hupe, Hunan, Kiangsi ja Mukden. Arvo mielde 50,000 olbmu læ duššam.

Okta likkolaš nisson.

Okta gæfhes nisson, Holtolenest, čali gieskad gonagassi adnom varas vahaš ruđa, vai son bæsaši divotet su boares vistides, muittala »Fjeld Ljom«. Ja stuores læi nisson illo go son oažoi 100 kruvnaseddel gonagasast. Son i læm ouddal oaidnam čuode kruvnaseddal ja dađe ucebbel æiguduššam dam, ja son i sattam algost jakket dam.

»Nuorttanaste« čalle, prenttejægje ja olgus adde læ G. F. Lund Sigerfjord, Vesteraalen.